

RABULÈTS vos djouwe lès sincieus.

On a bén volu nos sicrîre èt nos dimander : “Comint fé po d’ awè ène bèle grote, on bia trau d’ nûtons dins nosse djardin, nosse corti ?” Èt bén, volèz-v’ l’ crwêre, on va sayî d’ vos répondre. Po comincî, i vos faut trover l’ boune place à mète. Si vos sayèz d’ fé crèxhe ça dins ène sauvenîre, ewoussk’ i gn’a ki do sauvlon, c’n’èst nén lès pwinnes, vos arîz Bén trop d’ rûjhes. Kwèki, avou dès bègnons di tot-fêt d’avance mwartî, è pont d’ tîmps, vos sèrîz bin capâbe di vos rifé Massabièle èt z-î mète ène postûre di l’ Avièrdje. Vos n’sèrîz nén l’ prumî.



Ôte pau, si c’ è-st-ène trouffire. I gn’a pont d’ avance non pus. A ranchî insi, si vs’ avèz ène boune wîne, vos porîz vos ritrover avou ène bèle fosse à tchèrbon. Djokèz, c’ èst trop taurd po co gangnî dès caurs avou dès gayètes èt dès brêjètes. Ptète k’avou ène bèle taye di rotches à scayes, vos porîz passer vos chîjes à mète di skwêre dès riles d’ ardwèsses... Ptète ki po ça èto, c’è-st-ène miète taurd, kwèki...

L’ mia por vos sèréve di trover è vosse corti on bia tiène, èle bèle urêye di crauyeuse rotche èt d’ awè ène patiyince do diâle po z’î fouyî èt rinètiyî lès crayes èt lès traus. Avant d’ vos lèyî vos ènonder, i nos faut vos dîre ki, po fé ène grote èt lès traus d’ nûtons ki vont avou, l’ nateure, lèye, s’ arindje di deus manîres : l’ agnaedje èt li sipèpiyaedje. Kèsse ?

L’ agnaedje è-st-one tchimike atake à l’ asite :

L’ euwe di plouve, kèrdjîye d’ agnant (d’ l’ asite) va s’ moussî dins l’ trèfond del crauyeuse pîre èt l’ rondjî, l’ vèmi au mia, l’ sipipèyî tot à s’ n’ auje po z’ alaurdji lès

crayes, lès crèvaudes, lès fintes èt lès crèvûres.

Tot come on bokèt d’ fièr s’ èruni au frèche êr, li rotche è-st-atakêye, corodêye pa ène asite eûwe ki s’ muchant dins l’ daegne s’î kèdje do carbonike gâz (CO₂ s’ apinse lès sûtis) del’ tère.

Lès cochés, lès fouyes èt tos lès aubussons ki èxhène tchamoussenu fabrikenut on carbonike asite (c’èst come do djus d’ citron o do vinêgue) ki l’ gâz si mache avou l’ euwe èt l’ rind si bin agnante k’ èle po dissoûde èt fé toûner à rin lès pîres di l’ rotche di crauye èt z-î alaurdji

à s’ xhènance lès crayètes èt lès crèvaudes.

C’ èst come çoula k’ lès traus d’ nûtons s’ adouvenut.

L’ euwe a èto ène mècanike fwace di sipèpiyâdje èt d’ ûzûre.

L’ euwe d’ ène boune drache pout boler rade èt s’ kèrdjî d’ sêwes èt d’ broutias, d’ sauvlon, d’ gravî, d’ pîrètes ki, à roler èt fé dès cumulèts dins lès waches vont, piyane miyane, continuer à sikèter lès bètchants dès pus ptits cayaus auzè pus gros rotchîs. C’èst çoula ck’ on lome li lavaedje, l’ èrosion.

Lès fintes, lès crèvûres, lès crèvaudes, lès crayes s’ alaurdjissenut èt l’ euwe s’î pout avaler d’ pus è pus aujîyemint èt z-î tchère avou s’ kèdje d’ sauvlon èt d’ gravî ki, tot tapant sins pont d’ sogne sès stoûrbions dsus lès costés, lès fé co mia pèter à fwace di pokes èt di riftaedjes èt lès atèni todi ène miète di pus.

Po s’ afroyî todi pus profond s’ voye, l’ euwe fêt tot parêy ki limri dsus on bokèt d’ blanc bwès. Èle ûze, èle simîye l’ rotche. C’ èst c’ ki lès spècialisses lomenut l’... abracion.

L' agnaedje èt li spèpiyaedje font dès tchabotes ki finichenut pa dner dès grottes èt dès traus k'lès omes î polenut intrer.

Mins po ça, i faut lèyî l' timps au timps. C' èst k'î faut dès ans èt dès razans, dès miyons d' annêyes, po k' l' agnance di l'euwe, tos sès triboleus tchèryaedjes, lumsinant à s' nauje, ralaurdjissenuche assèz lès crayes. Lès ptits traus ni divègnut grands èt doner ène cauve, on colidor, ène tchambe èt adonpwîs dès bèles grandès places k' après one longue, longeuwe bouye di tchôkaedjes. Adon, lès omes polenut s' î moussî, s' î muchî, s'î wèspiyî come one inwîye, s'î cotwade èt z-î discovru lès biatés dès dzos d' tête, minme si sovént il î fêt ossi mate ki lètchasse.

Ène miète di pus ? :

Kand lès djèyologues, cauzenut dès monts d' crauye, i s' sièvenut d'on drole di mot : "**karst**". C'èst-on lomaedje ki vént d'ène sauvadje rèdjion d'Slovénie k'on î a studiye po l' prumî côp l' fènominne. On vos va don nèn l' translater è walon. Todi èst-ce-ti k' dins cès urêyes là, on è-st-acostumés à trover dès "**gofes**" ki dischindenut profond dins lès trèfonds dèl tête; dès "**dolines**" one èspèce di trêtwè, come on bènitî, ki l' euwe a dimèré didins on timps, èt fé ène basse, on ètang, po fini pa s'afroyî au truviè dès trawêyes rotches; dès "**tchantwès**" (nèn Tchantché, ènn'don), come on dirève ène vène, on aguijeu, on èguîdjwè ki l' euwe dès richots s'î vòre didins èt s'î piède po dischinde dins dès crévaudes, dès bilûres, è fé dès tchènaus, dès boyas èt ariver à fwace d' aploure à ridjonde Bén fond one rivîre dsos tête.

Sovint lès **gofes**, donenut dsus dès galèriyes, galèrèyes, èt dès grottes ki lès djins dins l' timps î polîne s'î mète à-rkwè

èt î viker à iute – bondjoû lès rumatisses-èt k' asteure lès tchauve-soris s' î plèjenut co todi Bén.

Lès euwes dsos têtes à s' cobate èt s'daurer dins lès assûres, kèrnates, à tchipoter pigote à migote, s' douvenut dès colouteusès vôyes; à fwace di trîler, d' agnî, di taper, d' bouxhî sins sogne di tos costés fèyenut tchère dès pirwès èt ariver a adouviè dès grands traus dzos tête, dès grandès places à bèlès dintèlêyes vossûres (come è l' grote di Han). Kand èle s'atritche, rèxhe au djoû, s' aboule, sovént au bas dès falîjes, ça vos done lès soûrdant èt lès pouhons ki, d' sêwes èt rigoles èt d' rus èt ris, arivenut ddins lès fonzêyes èt vos dner dès rivîres come dès fleuves èt s' d'aler piède dins lès grandès basses.



Dès mots d'pus ?

Tchauve-soris : dins lès clotchîs d' èglîje i gn'avève dès "tchauwes" (cwârbôs, Ôlotes) à î dimèrer. Adon on a lomé insi lès volantès soris.

Pirite : ène tinre pîre ki s' distatche aujîyemint : do schiste.

Sanke = broûs.

Sansroûle : Sangsue.

Kisse : pyrite di fyêr.

Stantche, astantche = obstacle.

Fauye : faille.

Fondrêye : ravin.

Dièle : tête glaise.

Chorer : trouer.

Pawè = Fleûr di tonwâr = coquelicot.

Li vinrdi 16 di may, tot xhoutant "700.000 Walons", si ça vos dit, vos avoz co ène tchance d' aprinde ène miète di pus dsus lès traus d' nûtons.



*Portèt d'on **soté** aparètu d'on côp sins k'on l' voliche...*